

ՀԱՅ ԼՈՒՍԱՎՈՐԱԿԱՆ ԳԵՂԱԳԻՏՈՒԹՅԱՆ ՄԻ ՔԱՆԻ ՀԱՐՑԵՐ

Ս. Գ. ԱԼԵՔՍԱՆՅԱՆ

Անցյալ դարի 50—60-ական թվականներին հայ գրական և հասարակական կյանքում կատարվող տեղաշարժերի, ինչպես նաև մտավոր և կուլտուրական նվաճումների պատմական իմաստավորման անհրաժեշտությունը գեղագիտական միտքն ուղղում է գրականության շատ հարցեր գաղափարական նոր դիրքերից գնահատելու և արժեքավորելու խնդրին:

Հասարակական կյանքում գրականության և գեղարվեստի ունեցած դերի լուրահատուկ ըմբռնումը, լուսավորական գաղափարների և գործնական ծրագրերի տեսանկյունից կյանքի ճշմարտացի պատկերման պահանջը համազգային առաջընթացին ծառայեցնելու միտումը գրաքննադատական մտքին նոր և ուրույն դիմագիծ են հաղորդում:

Նշված տասնամյակների հայ քննադատական մտքի ձևավորումը բխում է մտավոր շարժման ընդհանուր նպատակներից: Եվ պատահական չէ, որ գեղարվեստի շատ հարցադրումներ ծնվում են հրապարակախոսական հողվածներում, գրական շատ չափանիշներ ստեղծվում են ոչ թե գրականության ընթացքի տեսական ընդհանրացումներում, այլ իրականության բարեշրջման լուսավորական գործնական նպատակների թելադրանքով: Այս երևույթը գրաքննադատական մտքին հաղորդում էր ավելի ծրագրային, քան կոնկրետ վերլուծական բնույթ: Այդ տեսակետից գրաքննադատության ձևավորմանը նպաստող գործոններն ավելի խորն են: Դա ենթադրում է կապերի ավելի բարդ համակարգ, որը կպարզաբանվի լուսավորչների պատմափիլիսոփայական պատկերացումների և լուսավորական գաղափարաբանության որակական տարբեր դրսևորումների հետազոտությամբ:

Երևույթի գաղափարական արմատների ճիշտ ըմբռնման տեսանկյունից առավել անհրաժեշտ է գրաքննադատության նման կարգի ուսումնասիրությունը, հատկապես այն դեպքում, երբ 50—60-ական թվականների լուսավորական գրականության հետազոտության ընթացքը բնորոշվում էր ավելի գաղափարաբանության մտավոր պարտադրումներով, քան հայ հասարակական կյանքի զարգացման կոնկրետ պահանջների և խնդիրների գեղարվեստական արտահայտության վերլուծական բացահայտումով:

Ինչո՞վ բացատրել այս իրողությունը: Հասարակական արմատական վերափոխումների ժամանակ գրականությունը դիտվում է որպես գաղափարական պայքարի միջոց և բովանդակում է պատմական շարժման գաղափարայնության համակողմանիությունը: Փրկորդ պատճառը՝ գրականության և կյանքի փոխհարաբերության լուսավորական ըմբռնումն է, ըստ որի ազգային կյանքի զարգացման միտումները և առաջադիմելու մղումները ածանցվում են մտքերի և բարքերի բարեշրջությունը: Լուսավորական գեղագիտության իմացաբանական ելակետն այսպիսին է. կարծիքներն են ստեղծում կեցություն, գաղափարներն են կառավարում աշխարհը: «...աշխարհս անդառնալի կերպով

միտքին վեհապետական իշխանության կը վերաբերի...»¹, ասված է «Ծաղիկ» հանդեսում: «...գաղափարք կը կառավարեն աշխարհքը»², — նկատում է լուսավորիչ Ն. Զորայանը:

Արվեստի և կյանքի հարաբերությունը, մի այլ ժամանակակցի կարծիքով՝ այսպիսին է. «...ուստի, լեզու և գրություն ազգաց հետ քայլելով և հետևելով անոնց բաղդին պայծառության կամ խավարմանը, կը փայլին անոնց հետ և կ'իյնան անոնց հետ: Պատմությանց իմաստասիրությունը աս սերտ հարաբերությունն խիստ օգտակար հետևություն մը կրնա քաղել՝ բանականության ընթացքը ժողովրդոց վիճակներուն հետ համեմատելով: Կը տեսնեն որ ուր առաջինն է ծաղկյալ և հառաջադեմ, հոն մարդիք ալ փառաց և պայծառության մէջ հսկայաքայլ կը հառաջեն, և ուր լեզուն և գրությունը, այսինքն բանականությունն և դպրությունը, չեն մշակված վամ հետադարձ կը քայլեն. մարդկությունն ալ վարենության և կամ անկման վիճակին մեջն է»³: Այլ առիթով Ա. Հայկունին դրել է. «Ազգ մը շիկա աշխարհիս վրա որ իր ամեն կողմանն բրած հառաջադիմությունները և բարեկարգությունները գրիչին չի պարտավորի...»⁴:

Կարելի է բազմաթիվ մեջբերումներ անել նաև հայ մյուս լուսավորիչներից: Նման գաղափարական ելակետ ունեցող գրականության մեջ, բնականաբար, առաջին պլան է մղվում սուբյեկտի (հեղինակի) դատավճիռը իր գաղափարների տեսանկյունից՝ ուղղված երևույթների օբյեկտիվ զարգացման ընթացքին, իսկ գեղագիտական միտքը միտում է բացահայտելու թե դաստիարակչական և դիդակտիկ նպատակադրումներով ստեղծված գեղարվեստականացող գաղափարների որոշակի համակարգը մարդկային մտածողությանը և հետևապես սոցիալական ու ազգային առաջընթացին, բարեշրջությանը ի՞նչ շահով և ի՞նչ սահմաններում է նպաստում:

Պարզ է թե այս դեպքում գրականությունն ինչ դեր ունի, երբ խոսքն ուղղված է ազգային կյանքի եվրոպականացմանը և հասարակական կյանքի գործնական վերաշինությանը: Վերոհիշյալ օրինաչափությունը ավելի հստակ պատկերացնելու համար պետք է հաշվի առնել նաև հայ գաղափարաբանության և օտարամուտ ազդեցությունների փոխհարաբերության յուրահատկությունը:

Յուրաքանչյուր ազգի գրականություն կամ ազգային գրականություն որոշարկվում է տվյալ ազգի հասարակական կառուցվածքի ներքին խնդիրներով և պահանջներով: Այն յուրացնում է գաղափարներ և գրական ձևեր, որոնք ընդունելի և գործուն նշանակություն ունեն գաղափարական և պատմական շարժման պահանջների տեսակետից: Այստեղ էլ հենց ի հայտ է գալիս հայկական կյանքի և լուսավորական շարժման փոխպայմանավորվածությունը, որի դիմադրական ավելի հստակ պատկերացնելու համար բերենք գերմանական լուսավորիչներին բնութագրող Գ. Վ. Պլեխանովի մի դիտողությունը. «Նրանց թվում էր թե մտածողությունը ի վիճակի է փոխել կեցության բնա-

¹ «Ծաղիկ», 1861, № 18, էջ 140:

² Ն. Մ. Զորայան, Ընթերցասիրություն կամ գիրք կարդալու միջոցով մտավորական մշակության հասնելու օգտակար խրատներ (այսուհետև՝ «Ընթերցասիրություն...»), Կ. Պոլս, 1852, էջ 44:

³ «Բանասեր», 1851, № 10, էջ 446:

⁴ «Ծաղիկ», 1861, № 13, էջ 101:

կանոն ընթացքը: Նրանց պատկերացումն այն մասին, թե ինչ պետք է լինի, կաղմվում էր ոչ թե իրենց շրջապատող իրականությունն ուսումնասիրելու վրա, այլ արդարացի և նորմալ հասարակական կարգի մասին այն դատողությունների հիման վրա, որ նրանց մոտ եղել են տվյալ ժամանակ: Բայց այդ դատողությունները նրանց հուշում է ոչ այլ ինչ, քան նույն շրջապատող իրականությունը (գերազանցապես նրա բացասական կողմը)⁵:

Այս կետում է, որ օտարամուտ մտածողությունը հարաբերվելով գրական պրոցեսի պատմական տեղաշարժերին և սնելով այն, ստանում է տեղական կոնկրետ դրսևորում, իսկ գրական քննադատության մեջ՝ երևույթի տեսական իմաստավորման ելակետ:

Նշենք մի կարևոր հանգամանք, որ հատուկ է 50—60-ական թվականների մտածողությանը. ամեն մի հասարակական երևույթ գնահատվում է լուսավորությանը և համազգային առաջընթացին նպաստող իր գործնական հատկանիշների տեսանկյունից: Դժվար չէ նկատել, որ այդ շրջանի գրաքննադատության շատ չափանիշներ ձևավորվում են ելնելով հենց այդ պահանջից: Հայ լուսավորական մտավոր շարժման գործնական հեռանկարներն ուղղված էին ազգային կյանքի վերանորոգության խնդիրներին: Կյանքի վերափոխման հիմնական միջոցը և ուղին համարվում էր ժողովրդական լայն խավերի լուսավորությունը. «Բայց ազգային հարազատ լուսավորություն՝ առանց բուն ազգային մատենագրության՝ սուտ բան է, անարմատ ծառ է»⁶: Գրականության պատմահասարակական դերի այս կարգի գերազնահատումը, որը հատուկ է բոլոր լուսավորիչներին, ելնում է նրանց փիլիսոփայությունից:

Քննադատական հայացքների անմիջական կապը ազգային և հասարակական ծրագրերի հետ ակնառու է դարձնում հասարակական մտքի, հայ գաղափարաբանության առանձին կողմերի ոչ ամբողջական տարանջատվածությունը:

Հայ մտավոր շարժման առաջամարտիկներ Ստ. Նազարյանը, Մ. Նալբանդյանը, Մ. Մամուրյանը, Գ. Զիլինկիրյանը, Ն. Զորայանը, Ա. Հայկունին և ուրիշներ հաճախակի են անդրադարձել գրականությանն ու արվեստին, արժարժեքներ, երբեմն էլ մշակելով գրականության հասարակական նշանակությանն ու դերին, նրա արտահայտած բովանդակության, ժողովրդայնության, կյանքի ճշմարտացի պատկերման, երևույթների տիպականացման, ընդհանուրի և մասնավորի փոխհարաբերության (գեղարվեստական արտացոլման սահմաններում) մի շարք ըմբռնումներ. «Կատակերգության նպատակն է ընկերային ամեն տեսակ խայտառակությունները և մոլությունները նկարագրել այնպիսի ձևով և կերպով, որ հանդիսականը խնդալու ստիպված ժամանակ նաև բարոյական դաս մ'ալ տա անոր»⁷: Մի այլ ժամանակակից հարցը դնում է այսպես... «Թե ի՞նչ է թատրոնը, և ի՞նչ է թատրերգությունը, որ աստիճան կրթիչ և հրահանգիչ են մարդկության, և ի՞նչ կարևորություն ունին վերաբերությամբ առ մեր Ազգն»⁸:

5 Գ. Վ. Պլեխանով, Փիլիսոփայական ընտիր երկեր, հ. I, Երևան, 1960, էջ 469—470:

6 Ստ. Նազարյան, Վարդապետարան կրոնի հասարակաց հայախոսությամբ, Մոսկվա, 1853, էջ 6:

7 «Մաղիկ», 1862, № 23, էջ 179:

8 «Ժամանակ», 1863, № 3, էջ 19:

Գրականությունը հասարակական կյանքին ծառայեցնելու նման գործնական միտվածությունը լուսավորական բնույթ էր տալիս 50—60-ական թվականների հայ քննադատական մտքին:

Հայ լուսավորիչների գեղագիտությունը չի շրջանցում լուսավորական գաղափարաբանությունը, այլ ձևվում է այդ հիմքի վրա, ստանալով ավելի հրապարակախոսական, լուսավորական և դիդակտիկ բնույթ, քան՝ վերլուծական: Ընդ որում՝ այն ավելի շատ հակված է արվեստին առաջադրելու գործնական նպատակներ, լուսավորական գաղափարներ տարածելու խնդիրներ՝ ելնելով գեղարվեստական խոսքի գերազնահատման լուսավորական պատկերացումներից, քան բացատրելու՝ արվեստի փիլիսոփայությունը:

Ըստ լուսավորական գեղագիտության, արվեստի ներքին նպատակասլացությունը պետք է կազմեն ժամանակի առաջադրած պահանջները: Հետևաբար, կյանքի ճշմարտացի պատկերման պահանջը լուսավորիչների մոտ և՛ գեղագիտական ենթիմաստ ունի, և՛ ծրագրային, հրապարակախոսական. «Հետևողական լուսավորչի համար իրականության արտացոլման ճշմարտացիությունը ունի նպատակային նշանակություն, ինչպես պրակտիկ բժշկի համար՝ ախտորոշման ճշտությունը: Ծիշտ ախտորոշումը բժշկին անհրաժեշտ է նրա համար, որ իմանա թե հիվանդին ինչպես պետք է բուժել, լուսավորչի համար իրականության ճշմարտացի պատկերումը կարևոր է այնքանով, որ այն ցույց է տալիս նրան, թե ինչում է կայանում նրա թերությունը՝ ենթակա վերացման բանականության անունից»⁹:

Լուսավորական պատկերացման սահմաններում արվեստի դերը գիտությունից պակաս չէ հասարակական գիտակցությունը բարձրացնելու գործում, որը հասարակարգի բարեկարգման միակ ուղին է: Ի դեպ, նման տեսակետներ կան Մ. Նալբանդյանի հոդվածներում. «...բայց ամենայն բանիմաց և ճշմարտասեր հայի վերա պարտականություն կա պատժել և պատուհասել բերանով և գրչով ազգի պակասությունը, հրապարակել նորանց այնքան, մինչև որ ազգը տեսանելով յուր վերայի կեղտը, զզվի, գարշի և խնամ տանե լվանալու և մաքրելու յուր անձը...»¹⁰:

Առհասարակ անժխտելի է արվեստի դաստիարակիչ դերը և հասարակական գիտակցության վրա նրա ունեցած ներգործության ուժը, սակայն այլ է արվեստի մասին լուսավորական ըմբռնումը. այն հեռանկարների և ակնկալիքների ավելի բայն շառավիղներ է գծում: Արվեստը գնահատվում է կյանքի վերակառուցմանը օժանդակող իր հատկանիշներով. «Ինչպես որ ամեն կրթյալ ազգեր է վկայված է, ժողովրդական մը բարոյականը շտկելու մեծապես կօգնեն կատակերգությունները վասն զի մարդուս պակասությունները կատարելապես իրենց ամեն հանգամանքներովը դուրս կը ցատկեցնեն, ծաղրելի կընեն և զվարճություն տալով միանգամայն՝ կը խրատեն ունկնդիրները»¹¹:

Նալբանդյանը ևս այն կարծիքին է, որ իր քարոզած ճշմարտությունը գուցե կտրում է ազգի սիրտը, բայց այդ սուրը փտած և ճարակած խոցը առողջ մասերից բաժանելու և հեռացնելու միակ միջոցն է¹²:

⁹ Գ. Վ. Пелеханов, Сочинения, т. XXIII, Л., 1926, стр. 218.

¹⁰ Մ. Նալբանդյան, Ընտիր երկեր, Երևան, 1953, էջ 149:

¹¹ «Բազմավէպ», 1856, № 2, էջ 17:

¹² Մ. Նալբանդյան, նշվ. աշխ., էջ 141:

Իրականության բարեշրջման նույն տեսական-փիլիսոփայական մղումներով է ստեղծվում գեղարվեստական պատկերի ճշմարտացիության գեղագիտական պահանջը: Մի այլ առիթով Նալբանդյանը գրում է. «Լուսավորության, դպրության բանաստեղծի և հեղինակի պարտականությունն է ժողովրդի հասկացողությունը մաքրել, նախապաշարմանց և նանրահավատության մառախուղները ցրվել»¹³: Դժվար չէ նկատել, որ ուսուցիչներին նման Նալբանդյանը ևս գրականությունը դիտում է որպես լուսավորական գաղափարների տարածման կարևորագույն միջոց:

Նույն կարծիքին է և Ստ. Նազարյանը. նա գտնում է, որ մատենագրությունը նպատակ ունի «...տարածելու ազգի մեջ առողջ դատողությունը և խելացի լուսավոր հայացք...»¹⁴: Իսկ «Մեղու Հայաստանին» գրում է. «...հարձակվելով հասարակությանը մեջ գտնված վատ սովորությունների վերա և ջատադովելով լավ հատկությունները, կարող են հասնել իրանց նպատակին, որ է կրթել ժողովուրդը»¹⁵:

Լուսավորությամբ հասարակական կարգերը վերափոխելու ձգտող մտավոր շարժման ներկայացուցիչները միայն իդեալիստական փիլիսոփայության՝ «իրերի ընթացքը որոշվում է գաղափարների ընթացքով» պատկերացման սահմաններում կարող էին տեսական արդարացում տալ իրենց գործնական ծրագրերին: Հասարակական այս կամ այն հարաբերության փոփոխությունը դառնում է գաղափարների և կարծիքների փոփոխության հետևանք: Պատկերացումների այս լույսի տակ ստեղծվում է այնպիսի մատենագրություն, որը չի ներկայացնում կյանքը՝ իր շարժման իդեալի հեռանկարով, փոփոխման հակասություններով և առկայի ու իրականի սկզպույթի ընկալումով:

Լուսավորական փիլիսոփայական միտքը պատմության ընթացքը ընկալում է մտքերի բխման և հարափոխության շղթայի տեսքով: Կյանքի բնապատմական զարգացման շղթայում բանականությունը առաջադրում է որոշակի տեսական և գործնական խնդիրներ, որոնք կարող են իրականության նոր որակի ելակետ և պատճառ դառնալ:

Մ. Նալբանդյանը գտնում է, որ նախախնամության թաքնված շնորհները հայտնագործվում են այս կամ այն անհատի մեջ. «մտքերի անխափան փոխադարձից» հայտնագործված ճշմարտությունը դառնում է հանրության սեփականություն, ոչնչացնելով «բնական անհարթությունը» անհատների մեջ և բարձրացնում է ազգի ընդհանուր «բարոյական զորությունը»¹⁶: Մարդկային մտածողությունը առաջընթաց ներկայացնող այդ տեսական հեռանկարները ընկալում է գաղափարական տարրեր դրսևորումների ձևով:

Ազգի գոյությունը դառնում է անիմաստ և «անխորհուրդ», երբ այն իր մեջ չի ունենում զարգացման ներքին պոտենցիալ: Ազգի բնական առաջընթացի պատկերացման ոլորտներում ծնվում է զարգացող, փոփոխվող կյանքը պատկերելու գեղագիտական պահանջը, որը գրականությանը ուղենշում է ներկայացնելու ոչ թե կյանքի այս կամ այն կողմի մեռած պատկերը, այլ հին և նոր գաղափարների պայքարի գեղարվեստական վերարտադրումը: Կյանքը պետք է ներկայացնել մտածողության առաջընթացի տեսանկյունից, զարգաց-

¹³ Նույն տեղում, էջ 493:

¹⁴ Ստ. Նազարյան, Երկեր, Թիֆլիս, 1913, էջ 84:

¹⁵ «Մեղու Հայաստանին», 1866, № 13, էջ 99:

¹⁶ Մ. Նալբանդյան, Նշվ. աշխ., էջ 348:

ման հեռանկարով: Ամեն ինչ պետք է ծառայի կյանքի գործնական նպատակներին և պահանջներին, այլապես այն դառնում է ավելորդ և անիմաստ: Գրական երևույթը արժեքավորվում է լուսավորականության գործնական նպատակների հետ ունեցած օգտակար կապի սահմաններում: Այսպիսի հասարակական նշանակությամբ են ընկալվում արվեստն ու գրականությունը: Գործնական նպատակներին ծառայելու գրականության այդչափ ընդգծված միտումը՝ չէր կարող ընդգծված տենդենցիոզություն չառաջացնել այն դեպքում, երբ լուսավորիչների իդեալը իրականացման քիչ նախադրյալներ էր վերցնում կյանքից:

Երևույթը գեղագիտական բովանդակություն է ստանում, եթե հասարակական պետքերի անհրաժեշտ ճշգրտանվածություն և ձգականություն ունի: Գեղարվեստական գործի գնահատության չափանիշի նախադրյալ է դառնում երևույթի հասարակական ֆունկցիան: Փիլիսոփայական և հասարակագիտական մտածողության այս ոլորտներում պետք է հայտնաբերել լուսավորական գեղագիտության որոշ առանձնահատկությունները և գրականությանն ու գեղարվեստին առաջադրած նրա պահանջների յուրահատկությունը:

Ըստ լուսավորական գեղագիտության, առաջնայինը երկի գաղափարն է, իսկ երկի արժեքը չափվում է՝ գեղարվեստական համապատասխան ձևերի օգտագործմամբ և ընտրությամբ, որոնք ավելի ցայտուն են դարձնում երկի գաղափարը և իրագործում ստեղծագործության գաղափարական-գեղարվեստական, ինչպես նաև դաստիարակչական ֆունկցիան: Ամեն մի նյութ կարելի է ներկայացնել զանազան ձևով. «բայց ամեն տեսակի նպատակը պետք է լինի բարոյական խրատ և ուսումն»¹⁷:

Ժամանակների մեծ մասի համար արվեստի առաջնահերթ խնդիրներից մեկը եղել է հանդիսատեսի կամ ընթերցողի վրա առավել ուժեղ տպավորություն թողնելը: Մակայն լուսավորական գրականության և գեղագիտության համար այն ավելի ընդգծված և շեշտված է դառնում, երբ հասարակական վերաշինության իդեալները և մարդու էության բարոյականացման տեսակետները անմիջականորեն, ուղիղ գծով կապվում են այդ տպավորության հետ: Լուսավորական գեղագիտության մեջ ձևն անգամ ընկալվում է որպես դաստիարակող արժեք. «Թեատրոնական բանախոսության լեզուն չէր այնքան ազնիվ և մշակված, ինչպես պիտո է և արժան է լինել, որ ունենար դաստիարակիչ ազդեցություն ժողովրդի վերա¹⁸,—գրում է Մ. Նալբանդյանը Մոսկվայում բեմադրված «Արիստակես» պատմական ողբերգության առիթով:

Մեկ այլ տեղ Նալբանդյանը գրում է. «Այն հեղինակը, որ ոչ ամեն բան ցույց է տալիս ներգործողների ձեռքով, այլ երբեմն իր բերնից է պատմում նոցա մասին, նա լսեցնում է, որի տպավորությունն ավելի թույլ է, քան տեսնելու և շոշափելու տպավորությունը»¹⁹:

Երևույթը կյանքի պատկերների հյուսվածքում տեսանելի դարձնելը ավելի տպավորիչ է և ընկալման առումով՝ ավելի ներգործուն, քան հեղինակային դատողությունները՝ մի գեղագիտական պահանջ, որ հեղինակային սուբյեկտիվությունից և տենդենցի կոնկրետ, մերկապարանոց ցուցադրումից զերծ

¹⁷ «Մեղու Հայաստանի», 1860, № 44, էջ 351:

¹⁸ Մ. Նալբանդյան, Եժ, հ. 1, Երևան, 1945, էջ 391:

¹⁹ Մ. Նալբանդյան, Ընտիր երկեր, էջ 483:

մնալու պարտադրում է: Ռեալիզմի հետագա շրջանի գրաքննադատության մեջ նման պահանջը ավելի շատ այլ գեղագիտական հիմքեր ունի, քան արվեստի դաստիարակչական դերի օգտագործման պարտադրանք լինելը:

Այսպիսով, գեղարվեստական գործի կառուցվածքայնության շատ սկզբ-րունքներ թելադրվում են վերջինիս վերափոխող և դաստիարակիչ դերի գե-րադնահատված համոզմունքներին:

Ժամանակաշրջանի գրականությունը դիդակտիկ բնույթ է ստանում նաև մի այլ ըմբռնողության թելադրանքով. լուսավորական պատմահայեցողու-թյան սահմաններում բարոյականության ըմբռնումները բխում են բանակա-նությունից: Ընդ որում՝ հասարակական հարաբերություններն ավելի կատար-յալ և բանական տեսք կստանան, եթե անհատը կատարելապես գիտակցի իր բարոյական պարտականությունները: Մարդը «որչափ որ առանց բարոյական սկզբանց հմտանալու՝ բարոյապես ապրելն ալ անհնար է»²⁰: Նույն կարծիքին է Գ. Զիլինկիյանը. «Մտային լուսով միայն մարդս կրնա սանձահարել ինքը զինքը, անով միայն կրնա ճանշնալ և կատարել իր պարտավորությունը, որմէ դուրս բարոյական չկա...»²¹: Մի այլ առիթով ասված է. «Մարդուս բնավորու-թյան և բարուց եղծանելուն բուն պատճառը տգիտությունն է»²²:

Նման դեպքերում, բնականաբար, արվեստի առաջ պետք է դրվեն լու-սավորական գաղափարներ, բարոյական ըմբռնումներ տարածելու և պրոպա-գանդելու պահանջ, որը իր հերթին պայմանավորում էր լուսավորական երկի տիպաբանությունը: Եվ, իրոք, լուսավորական գեղարվեստական երկի տիպա-բանությունը իր վրա միշտ կրում է սյուժետային կառույցի, կոնֆլիկտի ստեղծ-ման ու լուծման դաստիարակչական արժեքի ըմբռնումը: Իսկ գեղագիտական միտքը գործի արժանիքը հայտնաբերում է նրա համազգային առաջընթացին նպաստող ներքին իմաստի և նպատակի մեջ: «Ընտիր թատրերգությունները գործնական կերպով ներկայացված դասեր են...»²³:

Նույն ձևով և իրականության ճշմարտացի պատկերման պահանջը լուսա-վորական գեղագիտության մեջ բեկվում է գրականության բարոյա-կրթական արժեքի և դերի ըմբռնմանը. մի չափանիշ, որ այս կամ այն կերպ կապվում է մտավոր շարժման տարբեր հոսանքների պատկերացումներին: Ժամանակա-շրջանի փիլիսոփայական մտքի տարբեր աշխարհըմբռնումներ ինչ-ինչ սկզբ-րունքային ընդհանրություններ և միանման եզրեր էին հայտնաբերում այդ հիմքի վրա: Վերակառուցումների կրքոտ և տենդոտ որոնումներին երբ զու-գադրվում է գեղարվեստական խոսքի կրթող և դաստիարակող արժեքը, գրա-քննադատությունը արվեստի առաջ դնում է լուսավորական նպատակներ և որոշակի խնդիրներ: Գրականության լուսավորական և բարոյակրթական կող-մը ավելի էր ընդգծում այն պահանջը, թե հեղինակը պետք է ունենա գիտե-լիքների մեծ պաշար, դառնա ժամանակի գաղափարական առաջընթացի կրող և բարձր կանգնած լինի ժողովրդական մասսաների մտածողական մակար-դակից: Լուսավորական գեղագիտությունը հեղինակին նույնացնում է ուսու-ցիչ հասկացությանը, մի տեսակետ, որ կծնվեր միայն լուսավորական գեղա-

²⁰ «Ընթերցասիրություն...», էջ 311—312:

²¹ «Մաղիկ», 1861, № 15, էջ 113:

²² Նույն տեղում, էջ 21:

²³ «Ժամանակ», 1863, № 3, էջ 245:

գիտություն մեջ, ուր արվեստի արտացոլած թուլանդակությունը նույնացվում է հասարակության քանական (գիտական և մտածական) առաջընթացի համընդհանուր բովանդակությանը: Նշանակում է ազգի բանականությունը գիտելիքներից և մտածական համապատասխան մակարդակից զուրկ է, որի բարձրակետից պետք է ներկայացվի շարժումն կյանքը կամ կյանքի շարժումը: Ուրեմն անհրաժեշտ է իմացական զարգացման ցածր աստիճան ներկայացնող ժողովրդի հասկացությանն ու նախապաշարումներին հակոտնյա մտածողական որոշակի մակարդակ. «Ամբոխի տգիտության ուսերի վերա մատենագիր լինել շատ հեշտ բան է... մատենագրությունը ամենայն ազգի մեջ պարտ է լինել հասարակության մտածող և բանագետ մարգերի կարծիքի և հայացքի հայտարար, բայց ոչ մի անկիրթ բազմության խակ ու թյուր կարծիքի և հայացքի»²⁴: Վերջին դեպքում գրականությունը իսպառ զրկվում է իր էական հասարակական նպատակադրումից և կորցնում է «ամենայն դաստիարակող ազդեցություն, մատենագրի կողմից հասարակության վերա...»²⁵:

Դիդակտիզմը, արվեստի էական հատկանիշ դիտող գեղագիտական դրույթները անհրաժեշտաբար կծնվեն միայն մտածողական և փիլիսոփայական պատկերացումների այն համակարգում, ուր կյանքի շարժումը դիտվում է որպես բանականության զարգացում: Եթե ժամանակի բարեշրջումը հասկացությունների զարգացման ընթացք է, իսկ վերջինիս կրողը՝ ժողովուրդը, ապա գրականությունը գործ ունի «ազգային ոգու և պետքերի» կամ որ նույնն է՝ տվյալ հասարակության ըմբռնումների, պատկերացումների և գաղափարների հետ: Ստացվում է այնպես, որ ժամանակաշրջանի հայ գրականությունը կյանքի հետ կապվում և այն արտացոլում է լուսավորական ծրագրերի թելադրանքով: Ընդ որում՝ ժողովրդայնության գաղափարը ձևավորվում է ժողովրդական ոգու, գիտակցության և քանականության համազգային առաջընթացի լուսավորական ըմբռնումից:

Լուսավորիչների մոտ «բանականությունը» ստանում է որոշակի պատմական լիցք և բովանդակություն: Վերջինիս հեղաշրջումը, որից ելնում է պատմության զարգացումը, հայտնաբերում է սոցիալական որոշ ուժեր, որոնք ի վիճակի են իրականացնել լուսավորության պատմականորեն մեծիմաստ գործը: «Ինտելեգենցիան դիտել որպես հասարակական զարգացման գլխավոր շարժիչ ուժ, զուտ լուսավորական մտահայեցություն է, հենված պատմական իդեալիզմի հիմքին»²⁶: «...Մեր խղճալի ազգը... իր ներկա լուսավորությունը և քիչ կամ շատ քիչ հառաջագիմությունը իր հեղինակներուն կամ գրագետներուն կը պարտի...»²⁷:

«Հասարակության և ժողովրդի կյանքից են ցանկանում նյութ միայն հարցնում ենք մենք. կա՞րողոք հասարակություն և ժողովուրդ մեր մեջը, որ նոր այնպիսի կյանք ունենա, որի մեջ մի բարոյական կենդանություն երևվում լինի: Մենք կարծում ենք, որ դեռ մեր մեջ կյանք ունեցող հասարակություններ չկան (այն քանի մի հասկացող, ազնիվ ու լուսավորյալ մարդիկը հասարակություն չեն կազմում. նոքա ովագիսներ են անապատի մեջ), այլ

²⁴ «Հյուսիսափայլ», 1861, № 3, էջ 5, 245:

²⁵ Նույն տեղում:

²⁶ Г. В. Плеханов, նշվ. աշխ., էջ 202:

²⁷ «Ծաղիկ», 1861, № 18, էջ 142:

կան միայն սնոտիապաշտ, դյուրահավան ու ըստ մեծի մասին միամիտ բազմություններ, հոտեր...

Ուրեմն եթե կամենանք նկարագրելու մեր հասարակությունների բարոյական կյանքը, պետք է հանդես բերենք այն անձինքներուն, որոնց կամքով նորա ցանկանում են այս ինչ կամ այն ինչ, խոսենք այն անձինքների վերա, որոնց զգացմունքներին, կրքերին ու շահին մեր հասարակությունները ծառայում են, պետք է առաջ բերենք այն անձինքներուն, որոնց ծուռը և ավելի կեղծ (притворный) հասկացողությանը և համոզմանցը մերոնք ըստ մեծի մասին ստրուկ են»²⁸։

Նման դեպքերում, լուսավորական ռեալիզմը ավելի շատ ծանրանում է մարդկային բարքերի, նախապաշարումների և սովորույթների վրա՝ հնթարկելով այն լուսավորական քննադատության և երգիծանքի։ Գրական երկը դառնում է տարաբևեռ համոզմունքների բախման գեղարվեստական դրսևորում, իսկ քննադատությունը հարաբերվում է գրականությանը, կյանքն իր իրական և ճշմարտացի դրսևորումներով ցուցադրելու գեղագիտական պահանջների տեսանկյունից։

Մի բան նկատելի է, որ հայ լուսավորիչների քննադատական հայացքները պայմանավորված են հայ կյանքի վերաշինության տեսական և փիլիսոփայական դրույթներով, իսկ նրանց գեղագիտությունը հիմնականում ունի լուսավորական-հրապարակախոսական բնույթ։

НЕКОТОРЫЕ ВОПРОСЫ АРМЯНСКОЙ ПРОСВЕТИТЕЛЬСКОЙ ЭСТЕТИКИ

С. Г. АЛЕКСАНЫ

Р е з ю м е

Армянская эстетическая мысль 50—60 гг. XIX в. формировалась под влиянием просветительского движения. На основе философских проявлений просветительского мировоззрения возникают те критерии и типологическое своеобразие (дидактизм, требование истинного изображения действительности, публицистический пафос, тенденциозность и т. д.), которые являются результатом одной из познавательных систем, свойственной армянской просветительской литературе и эстетике.

²⁸ Մեղու Հայաստանի, 1863, № 17, էջ 168—169։